



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma :



Tir Yimyim



tir_yimyim



tir yimyim

TAPAK 7

Asian Shooting C'ships:
Anish-i silver medal angu

Donald Trump-i China dang tariff
shilem 200 meshitsü amokmeren



VOL. XXII ISSUE NO. 314 (ADOK 314)

DIMAPUR

YANGTEPNÜ THURSDAY

LUROI (AUGUST) 28, 2025

₹ 5.00

Review petition sülen sorkar matsükshitsüla: RMSA 2016 batch

Dimapur, Luroi/August 27 (TYO): Tang tesüsa Mission Director, Samagra Shiksha Nagaland ajanga RMSA 2016 batch tesayurtem dang aremzüka atatsü aser Supreme Court nung review petition benoka aliba atatsü ayongzüka magizüker, ta Nagaland RMSA Teachers' Association (NRMSATA) 2016 batch ajanga Bodhbarnü sangdong ka nung ashi.

Court balalai obendang agüja aliba ama sorkari service benefits agütsütsü onoki alakya aremzüka küm toku dak tema ataogo, ta ashi.

Gauhati High Court indang Division Bench kati March 16, 2022 nung onok bhukuma obendang agütsü aser iba sülen Supreme Court-ia kasaji obendang agütsü, kong sorkar dang scale pay tekeraba nung agütsütsü tuyu, saka tanü tashi mapa kuma meinyaker, ta parnoki ashi.

Ajidang masü, April 2025 nungi tanü tashi itasen magütsür, aser sorkari review petition agütsütsü lemtetba ya obendang menudaktsütsü merangba dang lir.

Review petition indang Supreme Court nungi osang kecha arua mali aser High Court mesüra Supreme Court nungi stay order kecha agüja mali. Anungji onok bhukuma obendang agüja aliba ya tanü tashi shidak lir aser state sorkari inyaktsüla, ta ashi.

Onok ROP 2017 pay scale den annual increments shidak angutsü langa lir aser külem tesayur 2010-13 batch den kasa angutsüla, ta ashi.

Mission Director sangdong yagi nüburttem mangmangdaksür aser tim masü, anungji review petitions nung atsükshia mekazüi sorkari court obendang mapa kuma inyaktsüla, ta tesayurtemi ashi.

Rengma Colony nungi samapa tetsürchanu ngutetogo

Dimapur, Luroi/August 27 (TYO): Dimapur nung Rengma Colony nungi July 3, 2025 nü arishi küm 9 tain tetsür ka sama. Kasa anogo tebui FIR ka agütsü aser Women Police Station, Dimapur nung ken o ka benoka ketdangsür ka nem iba ken o bushisüngdangtsü nunglokja liasü, ta Bodhbarnü Dimapur Police sangdong ka ajanga ashi.

Iba sülen bushisüngdangba mapang iba tanur ya August 22, 2025 nü Naharlagun, Arunachal Pradesh nungi kumzü aser iba ken o dak sendakba nung nisung pongu apu - tetsür ka aser tebur pezü, ana Diphu nung apu, ana Jorhat nung aser ka Tezpur, Assam nungi apu. Tetsürila ya tang Child Welfare Committee (CWC) home, Dimapur nung yua lir, ta sangdong ajanga ashi.

Iba ken o nung temulung melemteni alirtem ya Diphu Police Station nung pua lir ta ken o agütsür nungi osang aruba sülrn Women PS Dimapur nungi osang

agiteper oa pua alirtem ya anir aru.

Iba sülen asüngdangyaba mapang Diphu nung apuba Nitu Nath (31) aser Protima Rajbongshi (30) ya apuani ta jangjatet aser iba ken o benoker ya tena den junga metettepa liasü.

Asüngdangyaba mapang tenati tanur ya nisung kati mepishiba ama pua bener oa AP nung sen 80,000 yong ayok ta ashi.

Tenati ashiba nung ajemdaker police temi Jorhat nungi Basu Dep Tanti (38) aser Suhban Ali (52) jangjateta liasü.

Parnoki tsüngsü sayuba nung ajemdaker police temi Biswanath Chariali, Tezpur nungi Milan Da Teta (38) apu aser asüngdangyaba mapang pai tanur aliba tesem temai adokja tanutsüla ya kumzük, ta ashi.

Iba ken o ano maneni bushisüngdangba mapang lir, ta Dimapur Police sangdong ajangasa ashi.

Ni aibelen mapa kecha inyaka mali: Nirmal Jain

Dimapur, Luroi/August 27 (TYO): Nirmal Kumar Jain-i özüng alema Dimapur nung ali-kimong ali aser ashikülak mapa inyaka Indigenous Certificate meshi ta tai tonglokja aliba ya tamendak dak maka aser tebilemba tamajung nung lir ta shiogo.

Bodhbarnü pa indang okatsür ajanga sangdong ka agütsüba nung, iba ken o ya okadak lir asünung aser nüngdakba ketdangsür dang kisüng langzütsü nüngdaka alinungji taoba mapang ni telangzüba magütsü ta pai ashi.

Ajisüka iba tai tongloksüba ya yimjak nung maneni prokshir asünungji, tang jangjashitsütsüsa akumer, ta pai ashi.

Document tiazi yanglua Non-

Naga Indigenous Inhabitant of Nagaland Certificate meshi ta tai tonglokja aliba khenyongi tai, ta Jain-i ashi. Pa mapa tamajung inyaker aser "land mafia" ka lir ta tai tongloksüba ya bilemba nung ajemdaker jembiba dang lir aser kuli maka, ta ashi.

"Kodang, kong aser komasür iba ama mapa ya inyakar tejangja kuli makai tapi agi sangdong agütsüba nungi ken o metembangtsü ta ajaki meteta lir," ta pai ashi. Yimjak nung ni tenüng menütsütsü tebilemba nung item tai ya tongloksü, ta pai ashi.

Mapa tamajung inyakba atema ken o benokba mesüra India nung court katia ni aitsüba mali, ta paisa ashi.

PM Modi sorkari Constitution nung mamanger: Congress



NPCC ajanga Bodhbarnü IMC Hall, Dimapur nung 'Vote Chor, Gaddi Chhod' (vote thieves, vacate seat) yimyim kübok state level rally ka ayongzüka akaba mapang tangokba noksa angur.

Dimapur, Luroi/August 27 (TYO): Nüburttem indang electoral rights tim masüba nung amshiba indang nüburttem nem angatetdakja Nagaland Pradesh Congress Committee (NPCC) ajanga Bodhbarnü IMC Hall, Dimapur nung 'Vote Chor, Gaddi Chhod' (vote thieves, vacate seat) yimyim kübok state level rally ka ayongzüka liasü.

Iba sentong nung jembidang, Constitution nung asen nem temeden agüja aliba asenoki kumzüka meyura Narendra Modi sorkari agientsü, kechiaser parnoki Constitution nung mamanger, ta AICC In-charge Nagaland aser Member of Parliament, Saptagiri Sankar Ulaka-i ashi.

"Party ajanga iba tebilemtsü temai adokdaksür, kechiaser Lok Sabha election nung menden 70-80 jungnüa tim masüba yimya amshia agiba kuli tejangja lir. Parnok dak yamaji inyaktsü temelaba mali, saka Election Commission aser BJP 'vote chori' ajanga parnoki menden kar nung takok ngutet, aji masünungbo Narendra Modi ya ato kilonser

mekumla," ta pai ashi.

Tangbo iba rara ya 'political' lir saka tanem-tanemi nübu ajungai shilem agütsü, kechiaser parnoki Constitution atema mebilemer. Mezüng noklem nung asenoki Parliament nung rara aser tang yimtung nung state level aor. Asenoki media kisüng nung masü saka yimtung nunga raratsü aser Constitution wazüka ayutsü, ta ashi.

Nüburttem indang electoral rights kumzüka ayutsü atema party-i iba campaign ya ayongzüker aser asenoki tang mesoitra, parnoki Nagaland nunga inyaktsü aser linük tesem ajunga nung inyaktsü, ta Ulaka-i ashi.

Taoba state general election nung nisung kwikati vote agütsü asenoki nguogo. Nagaland nung nüburttemi temetet Congress bhukumtsü aser ochi asoshi nokdaksü aser Constitution kumzüka ayutsü, ta pai ashi.

Congress ya tang party workers asendenshiba mapang ka lir. Rahul Gandhi-i mapang talangka melie Nagaland semdangtsü aser tzüsem tulu ama

party bhukumer alitsü, ta paisa ashi.

BJP-i tanen makai tashi ajak amshia Constitution raksatsütsü meranger. Parnoki RSS nung training agir alirtem amshir aser parnoki constitutional values tashi mait kumdaktsütsü meranger. Tanü nüburttemi parnok dak temla samaa aor, ta AICC, Secretary In-charge Nagaland, Christopher Tilak-i ashi.

Constitution kumzüka ayutsü indang jembidang nüburttem aser talisa lanurtemi kanga züba-züba agir. Anungji lanirtem den sendakteptsü tangya mapang shidak lir, ta pai ashi.

NPCC tir aser MP (Lok Sabha), S. Supongmeren Jamir-i ashiba agi, Constitution of India ajanga asenok ajunga nung temeden balaka agüja lir, aser ibaji vote agütsütsü temeden ya lir. Saka ajia Narendra Modi yimsüsüba kübok lendong nung lir.

Nüburttem temeden asoshi raratsü aser kumzüka ayutsü temulungtetba nung party lir aser Constitution, sobaliba aser yimsü-yimpong yazüka ayutsüba party-ji Congress ya dang lir, ta pai ashi.

State nung dental surgeon tem asendenshir

Dimapur, Luroi/August 27 (TYO): Directorate of Health & Family Welfare kübok National Oral Health Programme (NOHP) ajanga State Review Meeting and Training for Dental Surgeons sentong ka August 27-28, 2025 atema IDSP Hall, Kohima nung ayongzüka lir.

Iba sentong nung Dr. Reyosalu Lase, Joint Director (Dental) & State Nodal Officer, NOHP menden liasü, kong state tesem ajunga nungi dental surgeons tem review, training aser mapa tajungtiba nung inyakba asoshi tenüngsang agütsütsü asoshi adenshia liasü.

Sentong akhumdong ama Dr. Mereninla Senlem, Principal Director, Directorate of Health & Family Welfare aser tetushi tesemdang ama Dr. Avile Zao, Mission Director, National Health Mission dena liasü.

Dr. Avile Zao-i iba sentong nung jembidang dental doctor temi bendanga agütsür tenzüka

asoshi pelaba lemsatsep aser oral hygiene temaba jenjangi ajungketba aser moko ajanga timtem agütsüba indang nüburttem den lemsatsepba asoshi tenüngsang agüja liasü.

Laisa tele-dentistry, 3D printing, implants, laser treatments, CAD/CAM technology, aser artificial intelligence amala dental science kanga kera tejakleni aoba indanga lemsatsep aser dental surgeons tem dang technology den lirumedema alitsü aser NHM aser NOHP kübok item facilities agütsüba amshia state tesem ajungalen dental services tashi itdaksütsü ayongzüker.

Dr. Mereninla Senlem ajanga tajungshi o jembidang World Oral Health Day 2025 mapang Small States Category nung Nagaland ya "Best Performer" sangdongba asoshi dental fraternity nem tenüngsang agütsü aser ibai alizüngtajung ka tongtetba lir aser teamwork aser bendanga agütsür

inyakba temaitsü lir ta ashi.

Kechi südir süaka patients tem mezüng südaksütsüla aser dental surgeons temi OPD aser outreach mapa kasa inyaktsüla, ta lai ashi.

Sentong nung Dr. Arenla Walling, Additional Director (Dental) ajanga pela agizükba o jembiba, senior dental surgeons temi ketdangsüa health units 37 nungi presentation agütsü aser Dr. I. Simon Sumi, Deputy Director (Dental) & SNO, NTCP ajanga melepzüng o jembiba liasü.

Kasa sentong nung Naga Hospital Authority Kohima nem Best Dental Health Unit sempet agütsü; Dr. Esther Chopy (DH Mon) nem Principal Director's Commendation award for Best Dental Surgeon agütsü; Dr. Lemshikala Longkumer (DH Longleng) nem Best Dental Hygienist; aser Mengusenuo Sachü (DH Dimapur) nem Best Dental Assistant sempet agüja liasü.

Mokokchung nung DTFI senden menogo



Dimapur, Luroi/August 27 (TYO): Routine Immunization atema District Task Force senden Agust 27 nü Mokokchung DC office Conference hall nung menogo. Iba senden ya Mokokchung Deputy Commissioner Ajit Kumar Verma IAS lenisüba nung mena liasü.

Senden nung Consultant WHO (RRT) Dr. Mhechekhro

Mero-i, District Immunization inyakym, takoktem aser tawa alibatem idang Power point presentation ka agütsü.

Senden nungsa züngsemtemi district headcount aser immunization program nukjidong tongtettsü atema department tem den longjemer inyaktsüba indang sensaksema liasü.

Deputy Commissioner-isa, züngsemtem dang district

nung health dak sendakba inyakym balala benoka inyakba mapang shilem agütsü aser teka amteper inyaktsü mepeshia liasü.

Senden nung Deputy Commissioner, Mokokchung, CMO, DPO (UIP & RCH) DPO CD-1, Medical Officer, Consultant UNICEF, CDPO, DRDA, Rotary Club, IRCS nungi züngsemtem aser CMO staff temi shilem agia liasü.

Dimapur Press Club-i Press anema inyakba aitsü

Dimapur, Luroi/August 27 (TYO): Press nüjiso tashi meiti kümdaktsütsü atema amokmeren aser temerenshi tali kuma aoba ngua kanga süoki ia bilemba Dimapur Press Club-i sangdong ka ajanga metetdaksüogo. Press ya 'Fourth Estate,' ta züngshir aser iba yagi nüburtem tenüng nung tanüker ka ama inyakshir.

Press tashi meiti kümdaktsütsü atema merangba ya democracy nung tongshi tongtibang ka amakba lir. Asenoki press tashi meiti aser ola makai kümdaktsütsü merangba ya yimya ka ama mekümdaktsütsüla, ta DPC-i ashiba den lokti dang iba riju ya kümzüka ayutsü mepeshia metetdaksüogo.

Social media sabang balala nung tawa osangbener ka o agi merenshiba nguogo aser iba ya tang mezüng ataloker masü. Iba ya yimya ka kuma odar, kong Nagaland nung yimden yimsüsürtem, nüburtemi shima

toktsürtem aser extra-constitutional entities temi osangbenertem pei mapa inyakba mapang amokmerenba den mezüngmeshia merenshia arudar.

Amokmerenba aser tsükchitep ya anentsüla. Free Press kecha tetsübu makai inyakshangshitsü atema environment tajungba ka yanglutsü atema ajaki longjemer inyaktsü kanga nüngdaka lir.

Dimapur Press Club-i, osangbener ajak dang pei mapa tamendakdak nungi masetshitsü aser tongtibangsa professional integrity ajungkettsü ayongzükogo.

Tangari tamang katetba ya journalism tashi lir aser iba ya verification, fairness aser balanced presentation ajanga tali katetdaksür. Ano aibelentem ochishia metongshiba ya iba profession atema kanga tongtibang lir.

Osang kechi shitak aji agütsütsü bendanga agütsür

aliba ajanga journalism ya propaganda balala nungi bendangtsür.

State aser non-state actors temi Free Press amakba mapang ka nung ethical journalism indang principle tem tang kanga tongtibangba kümogo.

Mapa benoka inyakba yimya balala asütsü akok saka fairness, objectivity, aser nüburtem nem tamang katetdaksütsü atema tenüngdakba tinyaktsütembo kasa dang lir.

Osangbenertem ya yimden yimsüsüba tenzüker mesüra tashi tait nisung aser lokti tentet tenzüker mekümdaktsütsüla. Iba atema peisasa lepa repranghitsüla aser tenongshiba ajak nokdangtsü atema temulungtetba ka alitsü. Journalism ya tashi balala asadanga aliba lokti tentet ka ama inyakshangshitsüla aser tashi balala indang hadir kaka makümtsüla, ta Dimapur Press Club-isa metetdaksü.

NSDMA-i tsüingsang mopung indang metetdaksü

Dimapur, Luroi/August 27 (TYO): Nagaland State Disaster Management Authority (NSDMA)-i August 27 nungi August 30 nü tashi tsüingsang mopung indang metetdaksüogo.

Item anogotem nung Nagaland kübok tesem balala nung tsüingi aiba den tsüngmok moka yipur aitaba ajangshitsü aser August 30 nü tashi tesem kar nung tzünglu terara arutsü. Kohima, Longleng, Mokokchung, Mon, Peren, Phek, Shamator, Tseminyu, Tuensang aser Wokha nung August 30 nü mapang kar nung tzünglu aruba ajangshitsü.

Anungji iba mapang tsüingi aser mopung tesashi nungi jemboa alitsü atema jenjang agütsüla, koba ajanga communication aser connectivity minprongtsü akok. Tenemlen tzünglu kanga arura Dimapur, Nuiland,

Chumoukedima, Bhandari, Baghty, Tizit, aser Tuli amala lenden nung aliba tesemtem tzü agi metsüngtsü akok.

Iba dak sendakba nung lenden nung aliba district tem dang tzümettsüng arura teküboklen agüja aliba jenjangtem agütsü metetdaksüogo:

1. Kuli kakat aser oset t o n g t i b a n g t e m meraksadaksütsü atema locker nung yuang
2. Tzü agi metsüngtsü ana nung aliba tesemtem nungi nüburtem anintsü ajungshir
3. Gas leak asür masü kanga junga meita atang
4. Tzüngmetsü agi kongshir aliba chiyongtsü techi
5. Tzü agi metsünger aliba tesemtemi ajemok tei mesüra iba adena gari anir aotsü temerang
6. Electrical appliance tem

disconnect sür ali nungi ajungketa yuang

7. Tzü molor jemang mesüra chlorinated tzü amshiang

8. Kilentsü lapoker alibatem mesüra tzümettsüng channel tem nungi pila liang

Iba dak sendakba nung NSDMA, Home Department-i nüburtem dang lendong balala nungi jenboa alitsü atema kümküma alitsü mepeshia metetdaksüogo. NSDMA, Home Department-isa, District Disaster Management Authorities aser tanga line department tem dang tzüngluruwa mapang nisung taküm aser kiojen kümzüka ayutsü asoshi kümküma atatsü mepeshia metetdaksüogo

Jongdak mapang State Emergency Operation Centre (SEOC): Toll Free 1070 den t o n g t e p r a t e p t s ü metetdaksüogo.

Chumoukedimanung Pensioner tem asadangtsü

Dimapur, Luroi/August 27 (TYO): Sr. Treasury Office, Chumoukedima-i sangdong ka ajanga Pensioners shirnok iba office nungi itashia pension agizükdar, parnok dang 2025 küm atema annual Physical Verification September 8 nungi 12 tashi agütsü ta metetdaksüogo.

Anungji Pensioners ajak dang atakzükja aliba anogo verification atema arutsü metetdaksüogo, ajita mesüra pa/la itshia pension magütsü sota ayutsü.

PPO book den Life certificate form ya September 1 nü nungi office mapa agütsütsü.

Tenüngdakba kuli kaktemtem: i) PPO Book ii) Life Verification Certificate, Verified by a Gazetted Officer.

iii) Aadhaar card Photo copy iv) Pass book front page Photo Copy

v) Taoba ita trok tsüngda agiba Passport size photo

Atakzükja aliba anogo süitemba sülen arurtem shinga magizüktsü, ta kasa sangdong ajanga metetdaksüogo.

Maneni Pensioners temi Life Certificate form ya website <http://treasuries.nagaland.gov.in/download?type=Pension> nungi download sütettsü.

CANSSEA-i tenüingsang agütsü

Dimapur, Luroi/August 27 (TYO): Chief Minister Health Insurance Scheme (CMHIS) atema CIPS Innovation Award 2024 anguba asoshi Confederation of All Nagaland State Services Employee's Association (CANSSEA)-i Nagaland Health Protection Society (NHPS) nem tenüingsang agütsü.

Sorkari nübur ajak nem kecha tebandang makai healthcare dalang agütsütsü nükla aliba Iba naroküm agizükba ajanga kuli agütsür.

Iba takok asoshi benjungba mapang iba takok dak ajemdaker renloka aotsüjia kasa dang tongtibang lir ta angatettsüla. Nagaland kübok

iba service ajanga metongjemi aliba kinük nung aliba tesemtem dangi iba cashless service bener aotsü atema rangloker inyakba ajanga iba scheme atsülangshiba dang masü saka nüburtemi tali tamang katetdakja CMHIS tashi itshitsü.

Onoki maneni HPS, Department of Health & Family Welfare, aser stakeholder ajak dang parnoki anibelem mesasai inyakba atema tenüingsang agütsür aser Nagaland nung healthcare system melenshitsü atema jenjang tuluba agütsü yongya atar, ta CANSSEA General Secretary Yhunsenlo kent-i kasa sangdong ajanga metetdaksü.

Dimapur Press Club inti senden ayonger

Dimapur, Luroi/August 27 (TYO): Dimapur Press Club (DPC) inti senden September 1 nü Shamrock Hospital, Dimapur opposite nung E-Space nung 10:30 ako nungi tenzüka agütsü, ta metetdaksüogo.

Senden nung sensaksemtü aliba tongtibang onüktem rongnung, 2025-2027 tenure atema ketdangpurtem election agütsüba, membership aser

2022-2025 Audit report agütsütsüba densema lir. Züngsemtem dang onük kar danga lira bener arutsü metetdaksüogo.

Senden tembangba sülen DPC Silver Jubilee souvenir lemetsütsü. Anungji züngsem ajak dang senden nung adentsü atema mapang agüja tamakok maludaktsüi arua adentsü mepeshia metetdaksüogo.



Directorate of Information & Public Relations (DIPR)-i August 27 nü DIPR Conference Hall, Kohima nung "News & Photo Reporting & PA System Coverage" dak sendakba nung anogo ana training sentong ayongzüka agiogo. Training lapokba sentong nung Advisor to the Chief Minister and Chairman, IDAN, Abu Metha-i, state sorkar aser nüburtem sendakteptsütsü atema IPR shilem koda tongtibang iba indang lemsatep. Paisa, nüburtem nem osang shitak agütsütsü nüngdakba aser osang kara agütsütsüba masü saka shitak agütsütsüba dak rangloker inyaktsü koda tongtibang iba indang lemsatep. Pai ashiba agi, state nung aliba nüburtem nem sorkar sentongtem, scheme aser inyakymtem indang osang tejangja agütsütsü IPR department dang imlar. Maneni Metha-i state noksa yanglutsü atema department khuret dak rangloker jembia liasü.

J&K kübok Katra nung anentsüh lendong nung asür 33 jungogo

New Delhi, Luroi/August 27 (Agencies): Mongolbarnü Jammu & Kashmir kübok Katra nung Vaishno Devi tekülem ki anasa anentsüh lendong tulu atalokba nung asürtem 33 jungogo, ta Bodhbarnü ketdangsertemi metetdaksü.

Kashmir Valley nung tzünglu sashia aruba sülen tzümetsüng den anentsüh lendong kanga bulua atalok. Jammu kübok Doda district nunga tesem aika nung ajungbena tzümetsüng alua

aser kiojen aika raksatsüogo. Anogo ka tejaklena Kishtwar district kübok Chisoti yimdak tzümetsüng lendong nung Machail Mata tekülem ki anasa nisung aika asü.

Reasi District nung SSP Paramvir Singh-i, Katra kübok Vaishno Devi tekülem ki anasa anentsüh aluba lendong nung asürtem ajak senteper 33 jungogo, ta metetdaksü.

Tesem aika nung anentsüh aluba ajanga Jammu and Kashmir nung train service aika thinenogo aser Indian Army

White Knight Corps leniba nung kümzükbä maparen aser teyari agütsüba maparen inyakdar.

White Knight Corps-i X ajanga, "Relief Operations osang: Ardhkuwari, Katra nung Katra Relief Column #WhiteKnightCorps-i Shrine board, JKP aser CRPF sepaitem den senteper anentsüh lendong agi kongshirtem yaridar. Teyari balala agütsüsü atema agency ajak den amalitepa inyakdar. Onoki Tenzüker, Onoki Kümzüker," ta metetdaksü.

India nungi sepai 700-i 'Exercise Bright Star' nung shilem agitsü

New Delhi, August 27 (Agencies): Egypt nung ayongzükbä 'Exercise Bright Star 2025' nung shilem agitsü atema India-i Armed Forces aser Headquarters Integrated Defence Staff nungi sepai 700 yoktsü; iba exercise ya Middle East nung military drill tulutiba lir.

Iba exercise ya Egypt nung August 28 nungi September 10 tashi agitsü.

19buba Bright Star exercise

nung linük 43 nungi sepaitemi shilem agitsü. Linük 13 nungi sepaitemi shilem agitsü aser linük 30 observers asütsü.

Egyptian Armed Forces-i ashiba agi, taküm iba exercise nung sepai 7,900 dak temai shilem agitsü aser Middle East nung exercise tulutiba aser mapang talangtiba agibaji ya asütsü.

India nungia Indian Army, Navy aser Air Force sepaitemi shilem agitsü.

Iba exercise ya küm ana shia khen Egypt-i United States den senteper ayongzüker. 1980 küm nungi Bright Star exercise ya agia arur.

Middle East region nung security jenjang tajungba akümtsü, sepaitem tsüngda taliba amalitepa inyaktsü aser partner linüktem tsüngda osangtsüsang lemsatepa amalitepa inyaktsü nükjidong nung iba exercise agir.

Bihar electoral roll nung UP nung alir 5,000züngokogo: India bloc

New Delhi, August 27 (Agencies): Opposition INDIA teloktepi, Election Commission-i Bihar electoral roll nung Uttar Pradesh nungi voters 5,000 dak tali züngokogo, aser ibaji ajanga taruba Bihar assembly election nung ruling NDA jenjang ajungtsü, ta metetdaksü.

Phulparas, Madhubani district nung osangbenertem senden ka ayongzüka jembidang Congress national general secretary, Randeep Surjewala aser RJD MP Manoj Kumar Jha nati, melung melemetba voters ji teimbaka West Champaran district kübok

Valmiki Nagar assembly nung züngoka lir, ta metetdaksü.

Tenatisa, arrshi küm 45 tebur ka Uttar Pradesh kübok Khadda constituency nung voter lir, ajisüaka pa tenüngji Bihar voters list nung lir, ta metetdaksü.

Election Commission-ibo, ibaji parnoki imdangjema bilemba dang lir, aser iba atemaji kuli kecha mali, ta metetdaksü.

West Champaran district administration aser chief electoral office nungi ketdangsertemi, "Iba ya final voters list masü saka August 1 nü Election Commission-i

sangdongba draft electoral roll dang lir," ta metetdaksü.

District administration-isa, "Osangbenertem senden nungji melung melemetba voters 5,000 dak tali lir ta shiogo, ajisüaka osang tejangja mesüra kuli kecha mali," ta metetdaksü.

Parnokisa, "Valmiki Nagar nung aliba ayong nung tzü tesem melenshia ayimer, ibayongji aiben iba tesem nung alirtemi parnok 'address' melenshir, aser ibaji ajanga tenüng aiben agütsüba ataloker. Special intensive revision (SIR) agiba nükjidong ya item ama metokmeperi agientsü atema lir," ta metetdaksü.

Gaza nung osangbener pongu tepsetba India-i sashia aitsür

New Delhi, Luroi/August 27 (Agencies): Bodhbarnü India-i, Israel nunger sepaitemi anünglen nungi amakdang Gaza nung osangbener pongu tepsetba osang angashia aoksar aser sasa bilemtsür, ta metetdaksü.

Hombarnü Israel sepaitemi anünglen nungi amakdang Gaza

kübok Khan Younis nung Nasser Hospital anasa osangbener pongu densema nisung 20 shi süogo.

External Affairs Ministry otongdar, Randhir Jaiswal-i, "Osangbener pongu tepsetba osang angashia aoksar aser sasaa bilemtsür," ta metetdaksü.

"Rara nung nüburtem tepsetba tatalokbatem ajak India-i aija arudar. Iba tatalokba bushisüngdangtsü atema Israel ketdangsertemi tuyuogo ta osang angazüker," ta pai ashi.

Israel-i Gaza anema rara tenzükbä sülen nungi Nasser hospital-i maneni shirangertem aser yirurtem yaria arudar.



August 27, 2025 nü Bihar nung Congress lenir, Rahul Gandhi-i 'Voter Adhikar Yatra' nung shilem agiba noksa nung angur.

Supreme Court nung judge tasen ana shimogo

New Delhi, August 27

(Agencies): Bodhbarnü Bombay High Court Chief Justice, Alok Aradhe aser Patna High Court Chief Justice, Vipul Manubhai Pancholi na Supreme Court nung judge shimogo, ta sorkari metetdaksü.

Hombarnü Supreme Court Collegium-i tena tenüng benoka liasü aser tena SC nung judge shimba osangji Bodhbarnü Union Law Ministry-i sangdong.

Judge tasen ana jagi tenangzükbä agiba sülenbo Supreme Court nung Chief Justice of India densema judge menden ajak (34) abensatsü.

Ano Justice Pancholi bo 2031 küm October ita nung Chief Justice of India (CJI) akümtsü. Pai 2031 küm October 3 nü CJI tenangzükbä agitsü aser 2033 küm May 27 nü CJI menden nungi anisüngzüktsü.

Justice Pancholi ya 1968 küm May 28 nü Ahmedabad nung aso. 2014 küm Gujarat High Court nung pa additional judge shima liasü aser 2016 küm June ita nung permanent judge aküm. 2023 küm July ita nung pa Patna High Court-i yok aser judge tenangzükbä

agia liasü.

Taküm July 21 nü Pancholi-i Patna High Court nung Chief Justice tenangzükbä agia liasü.

1991 küm September ita nung pa Bar nung aden aser pa Gujarat High Court nung advocate inyak tenzüka liasü. 2006 küm March ita tashi pa Gujarat High court nung assistant government pleader aser additional public prosecutor inyaka liasü.

1993 küm nungi tenzüka pa küm 21 tashi Ahmedabad nung aliba Sir L A Shah Law College nung visiting faculty inyaka liasü.

Justice Aradhe ya 1964 küm April 13 nü aso. 2009 küm December ita nung pa Madhya Pradesh High Court nung additional judge shim aser 2011 küm February ita nung permanent judge shima liasü.

Pa Jammu and Kashmir High Court nunga inyak aser 2018 küm J&K High court nung acting chief justice shima liasü. Kasa küm nungsa pa Karnataka High Court-i transfer yok aser 2023 küm nungi Telangana High Court nung chief justice inyak. Tesüsa taküm January 21 nü pa Bombay High Court nung chief justice shima liasü.

SCHOOL MANAGEMENT COMMITTEE CHUCHUYIMLANG

CELEBRATION OF TEACHERS' DAY

Cum

5TH IMMAKMANGYANG

AWARD FOR EXCELLENCE IN TEACHING

DateTimeVenue

5TH SEP. 2025 | 10:00 AM | GMS LONGZÜNG

Order of the Program

1. Chair Person

: Mrs. Imtinaro

2. Invocation

: Mr. Imtiwabang
Gorkha Fellowship

3. Honoring of Teachers
& Special Prayer

: Mrs. Atula
Healing Home, CBC

4. Elucidation & Presentation
of Immakmangyang Award

: Mrs. L. Bendangsangla
Rtd. Joint Director School Edu.

5. Short Speech

: i. Mrs. Bendanglila, Coordinator
EBRC, Kobulong
ii. Award Sponsored Family

6. Significance of Teacher's Day

: Mr. Luin, Asso. Pastor, CBC

7. Presentation

: GMS Longzüng

8. Vote of Thanks

: Mr. N. Aotangit Longchar
SMC Chairman

9. Benediction

: Mr. Martemjen, Deacon

Volunteers: CBC Youth Ministry

Nagaland Health Protection Society

Chief Minister Health Insurance Scheme

Agreement Award PM-JAY

Health Benefit Package (HBP) ya kechi?

Health Benefit Package (HBP) ya AB-PMJAY aser CMHIS ama health insurance schemes kübok ayimjemba medical services, treatments aser procedures set lir. Package shia nungji sorkari agizükba fixed rate lir, aser iba senji service agütsüba atema hospital tem nem agütsür.

Küm shia coverage limit sen lakh 5 mesüra sen lakh 20 kübok total coverage amount nung ajemdaker masü saka treatment shia package rate nung ajemdaker hospital tem nem sen 'reimburse' sütsür. Item package rates nungji ajak densema lir, Doctor consultations, procedure jenjang, mozü, diagnostics, achi-ajemba aser hospital nung amongdang indokba densema lir.

Ya metetang:

* Hospital temi approved package rate dang nungi tali meshitsü makok.

* Item rates shidak meshitsü atema empanelled hospitals ajaki sorkar den tezüngzüktep agia lir.

* Beneficiaries-i sen tali agütsüsü menüngdak, ajisüaka item ama nungbo agütsüsüsa akümtsü:

i. Lemzüksüba dak alia pei sasa takdang tajungba agiba, mesüra

ii. Beneficiary-i melungba ama jenjang teimba indang implant asüba.

HBP rates reprangang:<https://cmhis.nagaland.gov.in/category/health-benefits-packages>

Teyari atema yangi call süang Toll-Free Helpline: 1800-202-3380



TIR YIMYIM YIMOBILEM (EDITORIAL)

DIMAPUR THURSDAY, AUGUST (LUROI) 28, 2025

Hanuman aser Mahabharata amangtsü asü?

- P Tiamongba Aier

Lok Sabha MP aser BJP lennir Anurag Thakur-i anünglaki mezüing atusangji Hanuman liasü ta ashiba sülen anogo ishika lir Union Minister aser BJP lennir Shivraj Singh Chouhan-i Wright brothers ajanga aeroplane meyagludang nungi India nung tayimtsü benshia liasü ta ano ashishitep onük ka jembiogo. Bhopal nung aliba Indian Institute of Science, Education and Research (IISER) nung Shivraj Chouhan-i Hindu tar nunger otsü nung aliba 'Pushpaka Vimana' indang jembia aser alemli nungi India nung advanced technology amshia liasü ta kaketshirtem dang ashi. Wright brothers-i aeroplane meyanglutetdang nungi India nungbo küm meyirjang aika tejaklen nungi drones aser missiles benshia aru aser ibaji Mahabharata nung asenoki angur ta Chouhan-isa ashi. Külen, Anurag Thakur-i taoba hopta Himachal Pradesh nung National Space Day sentong ka nung kaketshirtem dang "anünglaki shiba mezüing atu?" ta asüngdang aser idangji kaketshir kari "Neil Armstrong" ta langzü saka Thakur-i "nibo Lord Hanuman asütsü ama bilemer" ta meyiptsü. Takhur-isa pa indang X handle nung "Pawansut Hanuman Ji... the first astronaut" ta zülur National Space Day salem osang lemsatepogo. India lokti nung tanishir aser lennir aikati tamangtsü maketba o tem jembiba ya tang tasen masü aser tesüiba nunga aika angashia aruogo. Reprangdanga arunung ibala o ya BJP züngsemtem aser Hindu tamangba yimsü lennirtemi jembiba ajangshia arur aser parnok aikati Hindu tar nunger otsütem nung ajemdaker jembir aser iba nung lendong keta lir. Tanü India nung shia meteta angateta alirtemi item o ya mangashii odang yutsüra tarutsü nung parnoki tang jembiba onüktem den ano Hindu tamangba yimsü tar nunger otsütem ya textbook nung enoka züngdaksütsü kecha menua mali. Tanü BJP aser Hindu lennirtemi yimjak nung ototia parnok tebilemba aser tar nunger otsütemji shitak aser India nung alir ajaki amangtsüla ta südaktsünüa inyakdang Hindu nunger tashitemetetermi tejak mereprangi masü-a/meshitak-a ta tasü itta noktaksüla. Ano, tanüngba tamangba yimsü tanishirtem aser amangertemia masüba nungbo metsübui ola adoktsüla kechiyong tiyazü kaji terben jembidaksüra ochi ama akümtsü ana nung dang lir. Alima nungi meimchir ka mezüing anünglaki atubaji Soviet Union nungi cosmonaut Yuri Gagarin liasü. Gagarin-i April 12, 1961 nü Vostok 1 spacecraft nung mener alima longa senzü. Ano, alima nung tayimtsü mezüing yangluteterji America nunger adianu Orville aser Wilbur Wright na liasü. Tenati 1903 küm North Carolina nung mezüing atema tayimtsü anir ayimba putiotsü nung züluoka lir. Item otsü ya chichiba nung atalokba lir aser alima putiotsü nung tejangja züluoka lir saka India nungbo mezüing anünglaki aturji Hanuman liasü aser Mahabharata otsü nung shia aliba ama India nung küm meyirjang aika tejakdang nungi drones aser missiles amshia aru ta azüngtsüsa kümra ibaji shir tebilemstü asütsü? DMK MP Kanimozhi-ibo Anurag Thakur aitsüogo aser lai "Science ya tar nunger otsü masü" ta shiogo aser ibaji kanga shitak lir. Anungji India nung tanüngba tanishirtemia political party mesüra tamangba yimsü mereprangi la pusema ola adoktsüla aser Hindu nunger teimba ser aliba linük ka asüyonga, par tar nunger otsü sülen masü saka alima sülen anidakba linük ka süa aotsü atema shisatsü agüja len anitsüla.

OLEMSABANG

SHIDAKBA MELENSHITSÜLA

~ M. Meren, Ex.pastor.

Ao Arogotem nung asentenshi tenzükbaji 1951 aser 52 küm nungi talisa tenzüka aru, iba mapangjibo Revival tabo mejembi, saka Arogo combine agir tasa jembia agia aru, saka iba mapangjibo Arogo menden aser amangbapurtem ajakji tongmelang tamang nung kanga dang akanga amanga aru, iba mapangjibo amangbapurtem rong nung yi ajemer kata mali asü, aser aiür-asangur kar tera tajitettsü keta ajitetra Arogo mapangser ki tonga tasüngdangisa yok, kar senotsü nung tera ochi mashi putetra Arogo nung endoka aru, amangbapur kar bodbar aonung alu nung yipra Arogo nung tatok mebidaktsü, amangbapurtem rong nung kar deobar jajara tatok mebidakja aru, akidang ama asü nungbo tanü pastortem aser Missionarytem ajak Arogo nung endoker lila. Aki tsürabur tamangbo kanga akanga amanga aru, deobar tekolak ku mejepa maru, deobar süng maso, deobar tsük mabu, deobar atsüki melapok, deobar ka ana sentepi marura mapangser tasüngdangi yok, yamaji inyaka aru, Deobar yim atena aini mao, adianu kar Hospital nung munga aliba semdangtsü asoshi Deobarnü aotsüsa kümra Deacontem dang sudi meshir dang shiranger semdangi hospilai ao, Arogo maparen kar inyaktsüsa adokra Arogo tenzükertembo hajira magi inyak, yamaji taoba mapangbo Arogo rongsen yashinangshia amshia maru, kadang pastor aini odir mesüra Deacon kar aini odir hajira magütsü, tetsüing tesa agi mapangseri khu bener anidak, hapta piyong senzüaka hajira maka aser DA kecha maka yamaji tamang agi taküm bendanga agütsür inyaka aru. Aser Pastor aser Missionarytem Deobar nü sayutsüingia monger Arogo nungi pei yimtsüing apusoa aodang kenyongi hiki kata teyari magütsü, angati sayutsüing, angati sermon asemen pezüben agüjaka taa magi, chia ajembaji teperi, kechiaser paa Arogo nungi ita sen agia inyaker anungji talila yangku nung semtsüba kecha maka inyaka aru, tanü putu nung sayutsüingirtem ya ayanger temeja lir, Arogo ka nung ken sayutsüing nung mirijang terbo angur, ananü asemnü among nungbo merijang 20 tashia angur, saka aji par agi alang süla, saka aji temoatsübo masü, tanü putu nung tapusodang yongi Arogo gari nung apusotsü, Arogo nungi sungu ajemtsü abentsü aser tesenshidang tamongdak Arogoi yangkhu sünga semtsür yoktsü, kanga dang jangratemtsü tulu lir, saka aji temoatsübo masüako aji ayanger tenzükertem tang ta ajiteter. Anungji item amala nungi Arogo temulung meyiptsü mapang tongogo.

Aki putu nungi tanü putu tashi Arogoi amangbapurtem temulung meyipang ta asentenshi mapang shia ayongzük, anungji amangbapurtem timbaka asentenshia taküm jenti yanglushia kotaki ogo aser ano aika kotaki aotsü renemdagi, saka tanü tashi nung Arogo temulung meyipba mali, Arogo ajak nung asentenshi mapang shia akar aser amangbapurtem jentisa jenti temulung meyiper saka Arogobo temulung memeyiper, aser Arogo temulung memeyip tashi alimaji kodanga majungtsü ta ajiteter. Aki tsürabur mapang nung yi ajemer Arogo nung metenzükdaktsü aser Sali moko achir Arogo nung metenzük aser amangbapur kar yi ajemba Arogoi metetra tenla kidang nokdaka tatok mepidaktsü, yamaji Arogoi inyaktet saka ajiang tanü Arogo tenzüker yi ajemer, Sali moko achir anungji Arogoi tama temulung meyiptsüla yamaji meinyaktetra Arogoi asentenshi ayongzüka machi majemtsü nungi pila liang ta majungshitsüla, saka Arogoi tama meshitettsüla.

Tanü lima nung Minister ajak ochi mashi temeja aser Secretary Director ajak ochi mashi temeja aser yimtsüing nung yimsüsürtem ajak ochi mashi temeja ta nüburtemi jembir ibaji shitak asütsüa akok mesüra tiyazü asütsüa akok aji pari aser Tsüngremi dang metet, saka tsürabur mapang Arogo nung kadang sen sarua tenla bendendir Tsüngrem dang ya ajak meshitetjang ta sarasademer shibanga ayu, aser kadang sen agitettsüsa südir tamshir nisung ana medema lia dang senbongji lapok, anungji akidangbo Arogo sen miima achir matoktang. Saka tanü putu nungbo iba rongsenji Arogo nung tamshirtemi ochi mashi amshi mesor aser tera tera agiteta chimatsür, merijang ter agi peritsü sentong nung merijang tenem endoker aser receive pei sasa zülua agütsür aser Auditori aji kecha mashishi agizüker, kechiaser Auditortemjia Arogo tenzüker timba anioka inyakdaktsür, yamaji tamshirtemi Arogo rongsenji yashi-nangshia amshir aji oda tanü putu nung Pastori Arogo sen miimzüka agiba osang agi alima sünga jembir, ya osang tajung masü, aser tera tera agiba agi mirijang ta masü saka Lakh aser crore samaba arogo aika nung ataloker aser aji pastor dak timba atonger. Saka Yisuibo Ango ana aser amtsük pungu agi moatsüba telok chir mechimaba yashi-nangshia meintoktsü asoshi kata mesamai bendenang ta ashi anungji aji nütsüngtemi timi benden nung malok 12 bententet, tanüa Arogo tenzükeri yamaji bendentsüla.

(Maneni asüing adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

ABAM,Ao Senden aser Mkg Officers Telungjem senden amen



Impur, Luroi/August 27 (TYO): August 26, 2025 anogo nung ABAM, Ao Senden aser Mokochung Ao Officers' Telungjem (MAOT) otsü nung tang mezüing külemi ajurutepa sensaksem sentong ka Impur nung agiogo.

Iba senden ya Aortem aser ano talisa ABAM, lokti inti asoshi yimya balala nung nüngdakbapur asoshi achaayanga anganür ka sütettsü nükla nung agia liasü. Talisa tang akhi yimya nung inyakba nungi asen sasa inyakteta koda nüburtem nem anganütsütettsü ta asüba nükla yur amen, ta ABAM Executive Secretary, Rev. Temsu Jamir-i sangdong ka nung metetdaksü.

Lokti asem lungjemba nung temelenshi bener arutsü reprangtet nung iba senden ya ayongzüka agiogo. Amanger, memenui Tsüngrem teyari ajanga nükjidong ataloktsü.

Rev. Temsü Jamir, Executive Secretary, ABAM ajanga mezüingbuba August 23, 2025 anogo Ao Sendeni Ungma yimtiba nung asen Naga nunger yimjung aser telungjem adoktsü nükla nung sentong achaayangba asoshi pelaba shia

liasü aser memenui osang tajung angashitsü yimlaba o shisem.

"Tejen Lai nung yimsüsür aser lenirtemi nüburtem tsükchir ket nungi kümzüka ayuba, nübur asoshi yimjung bener arutsüba aser Tsüngrem tenzükba tatishitsü bener arua tanü yimsüsür aser lenirtemi nüburtem asoshi itemji inyaksü kanga rongdak nüngdak lir. Ajisüaka tesasatsü kaji, tanü yimsüsür aikati sentepi marur. Tanü asen Aortem asoshi tsükchir anaji Election aser Kini Kin ka anemba ya lir, yamala tensa ka nung asenoki lanurtem asoshi kechi jenjang yutsütsü?" ta pai sasaba olen ka ashi.

Asen Aortemi amshiba "Nülak songba" koba ajanga ochi mapa sayur, ya khen shisadangtsü mapang. Tanü ochi kechi tia nung lir? Item tebilemdangtsü onüktem nung ajemdaker Aor lokti aser ABAM koda sür nübur asoshi anganür ka küma yimji yimjung tensa ka bener arutsü, ta onük tuko (9) lemsatepa liasü.

Aortem asoshi asüingsashi tetezü kechisa asütsüaka? Nütsüng ajema akümba, Yimtsüng toktsür Jilai aoba, Ao oshi mesaboba, Election merüka

magitetba, Impur Christian Hospital tia, Impur nung tangazükdak museum ka yanglutsü, ABAM resource centre, Kangtsüng ya tangazükdak tesem aser Educational eco tourism resort ka akümtsü aser lanurtem asoshi pei sasa inyaka litettsü asoshi Christian entrepreneurship curriculum ka yanglutsü.

Item onüktem nung sensaksem tajung agir, tarokba nung bushidanga inyaka aotsü asalentong bener arutsü asoshi luden (committee) 6 shima October 16 & 17, 2025 anogotem nung senden amentsü lemtetogo.

Ao Senden aser MAOT Tir ajanga yamala sensaksem senden tajung ayongba asoshi ABAM dang pelaba lemsatep aser parnoki arok telungjem nung asen Aor aser ABAM jenjang tajung kati bener aotsü nükla tulu lir, ta shisem.

ABAM ajanga Ao Senden aser MAOT dang ABAM den külemi teka amtepa aotsü mangdang tajung akaba asoshi pelaba lemsateper.

Ajak agi telok asem nungi lenir 25 arua iba senden nung aden.

ANOGO ABEN TSÜNGREM DEN

Temeshiba metsü prokba

Saka temeshiba prokeri chichiba sempet angur.
A.Shin 11:18b

Asenok taküm kümzüka alitsü leman aika lir saka temeshiba asoshi asenok sasa bendanga agütsüba nung sempet tulu agütsüba danga leman kecha nunga mali. Asenok jenjang ajak Tsüngrem temeshiba sayutsüla aji tekümtet ajanga asenok meyong lir: asenok tebilemba temeshiba asoshi bilemba asütsüla, idangji asenoki kechi bilemer aji Tsüngrem chir asoshi mapet masütsü; asenok mapa, idangji asen takümi temeshiba Tsüngrem ka tenzüker ta kuli asütsü; asenok tsüngchiba, idangji asenok tesendaktep ajak nung shingai mashishitsü.

Ne taküm nung nai Tsüngrem temeshiba sayur asü? Temeshibaji nai ne taküm nung mapa inyaksü melaba lir. Temeshiba bilemba metsü proktsü melen, nai tebilemba nung tamajungba aser temenen tebilemba indaktsür asü? Nai shi jangraba menokdangi mesüra tatok magütsütetba ne taküm nung lidaktsür asü? Yisui ashi asenok Tsüngrem aser Pa temeshiba tema bushira Pai bendenloktsütsü (Matt. 6:33).

Temeshiba metsü prokba nung sempet tulu lir. Tang nai ne taküm nung metsü proktsü sentong lir? (1 Peter 1:15). Ne tebilemba temeshi asütsü asoshi nai ne kolok nung temeshiba koda ayur? Na tsüngchir süa alitsü asoshi ne tesendaktep nung temeshiba koda arur? Asüng nai ne taküm nung temeshiba aluruba kanüra, tanü nai temeshiba metsü azüngtsüla.

Gaza City azüngtetjang ta tuyuba ajanga Khristantem timtemtsü

August 27, 2025: Tawa Israel sepaitemi Palestine nungertem dang Gaza City azüngtetjang, ta tetuyuba agütsüba ya Khristantem atema tasüba temerenshi obendang ka amai lir, ta Arogo lenirtemi metetdaksü.

Greek Orthodox Patriarchate of Jerusalem aser Latin Patriarchate of Jerusalem nati külem sangdong ka ajanga, Israel sepaitemi nüburtem dang Gaza City toktsür oadokang ta tetuyuba agütsüba ajanga talisa Tenla kitem nung jenoka alirtem kanga timtemtsü, ta metetdaksü.

Israel-i parnoki tashiyim amshia Gaza agitsü tebilemba aliba lemsatepogo. Iba ya Hamas-i amakba nokdangtsü atema inyaker ta Israel-i metetdaksü.

Gaza nung rara tenzükba sülen civilian teimba ser nisung meyrjang aika süogo, aser Gaza nung tenokdangba balala ajanga tang Gaza nung yawara lir.

Gaza nung Arogo asem liasü, ajisüaka tangbo Arogo ana dang lir. Arogo anaji Church of Saint Porphyrius (Eastern Orthodox) aser Holy Family Church (Catholic) na lir. Gaza nung rara

tenzükba mapang nungi tenzüka Tenla ki ana nungji Khristan noklang aika jenokdakja yariogo.

Holy Family Church Tenla kidang tetsür-tanur teimba ser nisung noklang aika jenokdakja yarir aser matamabensartemji Sisters Missionaries of Charity-i anepalua yarir.


Orthodox aser Catholic lenirtemi, "Gaza City toktsür south tsütsüleni jena aotsüji tasüba temerenshi obendang anguba den kasa lir," ta metetdaksü.

"Ibaji ajanga Arogo lenirtem aser nun temi yimti toktsür maotsü saka Arogo compound nung jenoka alirtem maneni yaritsü telemtetba agiogo," ta Khristan lenirtemisa metetdaksü.

Tang Israel tetuyuba tasen ajanga Gaza nung Khristan nütsüng ishika den Tenla kitemji kechi tia ai aitsüar mejangjai kümogo.

"Iba ya tim masü. Kangshia nüburtem ainshidaktsütsü merangbaji tim masü. Iba rara anentsü aser nüburtem taküm jenjang tajungba akümtsü atema inyaksü mapang tongogo," ta Arogo lenirtemisa metetdaksü.

Edinburgh nung Arogo kati mission atema rong amshitsü



Polwarth Parish Church indang mission rong noksa nung angur.

August 26, 2025: Scotland kübok Edinburgh nung aliba Polwarth Parish Church-i Union Canal nung mission mapa inyaksü asoshi süklep 60 rong ka amshitsü.

Tamalen iba rong ya Arogoi charity telok 'People Know How' den senteper amshia liasü, saka yaküm November ita nungi mamshi.

Tangbo iba rong ya Arogo

kija meyong kümogo.

All Abroad Management Board nungi Dawn Purves-i, "Iba rong ya Polwarth Parish Church meyong akümba atema pelar aser onoki maneni mission mapa inyaksü atema iba rong amshitsü yongyar," ta metetdaksü.

"Yaküm November ita tashi nung iba rong ya ita tenet amshia liasü. Nisung 1,000 junüai iba rong amshio," ta pai metetdaksü.

Iba rong nungji Bible study agitsü, Sunday School class agitsü, sarasadem sentongtem agitsü aser mental health agi shirangertem anepaluba nung amshitsü Arogo tebilemba lir.

Purves-isa, "Onoki iba mission atema telok balala agizüksü aser Arogo ka ama Khrista osangtajung lemsateptsü atema iba rong amshitsü," ta metetdaksü.

AO OSHI ANGAZÜKDAK:**TANÜ ANGAZÜKTSÜBA OJANG****Tesütem**

(adj) mechira aküm (blunt)

* Nok tesütem agi süng melepzüktettsü.

Tesütep

(adj) kasasa putep-putepa (matching)

* Asangursang agitsü atema tesütep tetsür ka bushir.



Tir Yimym

OLONG PAITEP # 7253

1						2				3
								4		
5		6				7				
8										9
								10		
				11		12				
		13								
14						15				
				16						

TIPIEN

1. O jembitsü tashi - 8
5. Süngjang tapu ka - 5
7. Tekanük nung enokba - 5
8. Teka amtep - 5
12. Tzüik asendak - 5
14. Tsüngpang tema aliba - 5
15. Ken atenba yimya - 5
16. Asangur - 8

LANGTSÜNGLEN

1. Tepok telung nung shilem ka - 7
2. Tamajung aküm - 5
3. Chi den külemi achiba - 3
4. Meimchir alimai aruba - 3
6. Laishiba nung ayong ka - 4
9. Tarutsü nükla - 7
10. Tamendakdak/Nükjidong - 4
11. Tenük-telen mejungi aküm - 5
13. Terok nungi adokba - 3
14. Meimchir telemsa - 3

OLONG PAITEP # 7252 TELANGZÜBA**TIPIEN :**

1. Taa, 3. Teküm, 6. Aibelen,
7. Aut, 9. Ajizük, 10. Ojala,
11. Semer, 13. Sen,
15. Kioktsü, 17. Itsük, 18. Kar.

LANGTSÜNGLEN :

1. Tai, 2. Asensor, 3. Tanü, 4. Kua,
5. Mitsüktsü, 6. Azübenshi, 8. Lah,
9. Jangkok, 12. Akok, 14. Nashi,
16. Sür.

NAI-A YA METETTER MA

Temüjin shiba dang Genghis Khan ta aja, pa ya 1155 aser 1167 tsüingda aso. Pa ya Mongol Empire ngutetsang aser mezüngbuba Khan liasü. Pa taküm nung mapang talangba ka Mongol nunger kintem longjemdaksütsü atema mapang intokba sülen pai tanga linük amak tenzük aser China aser Central Asia nung tesem aika atsünga liasü. Genghis ya Western Xia nung pa anema nokdakertem azüoktsü merangba mapang 1227 küm asü aser 1229 küm par jabaso Ögedei-i pa melena liasü.

Meghalaya nung okadak kati HYC lenir 5 jaok

Shillong, Luroi/August 27 (Agencies): Meghalaya nung Judicial Magistrate First Class indang court-i Mongolbarnü Hynniewtrep Youth Council (HYC) lenir pongu jaokogo. April 4 nü North Eastern Indira Gandhi Regional Institute of Health and Medical Sciences (NEIGRIHMS) nung tatalokba dak sendakba nung parnok ya jaokogo.

Parnoki Director Prof. Nalin Mehta indang mapa minprong aser tashiyim agi Administrative Block shibangtsütsü meranga liasü.

Iba tatalokba sülen police-i jenjang agia HYC tir Roy Kupar Synrem, vice president Donboklang Kharlyngdoh, general secretary Rhembor G Saibon, secretary Issac W Basaiawmoit, aser education secretary Enlang Sawian nunger anema FIR ka benoka liasü. Ita ana tsüingda ketdangsürtemi charge sheet ka file asü kong Bharatiya Nagarik Suraksha Sanhita kübok aibelen aika züngoksemotsüogo.

Okadak nokdakba sülen osangbenertem den sensaksemba mapang Synrem-i ashiba agi, parnoki charge sheet aser tanga kuli kaketttem

agizükogo. Paisa, taitüsüba nung NEIGRIHMS Director aser staff amokmerenba, criminal trespass, assault aser public servant ka pa mapa minyakdaksüi nokdangba densema lir ta ashi. Synrem-i ashiba agi, temzüng ozüng kübok inyakyim nung shilem agitsü lenirtemi mulunga lir aser judicial inyakyim dak tamang akar.

"Lisopur lanurtem temeden kümzüka ayutsü onok bendanga agütsür lir. Employment aser reservation amala ken o jembitsü atema temzüng ozüng kübok tashi kechia onok menokdangtetsü," ta Synrem-i ashi.

Pai ashiba agi, HYC-i taoba mapang NEIGRIHMS Director nem parnok tebilemtsü kar atema telangzüba agütsütsü anogo tener atakzükja liasü. April 3 nü tashi nung Director-i telangzüba magütsüba sülen ken o jangjashitsü atema HYC züngsemtemi tasüingnü institute semdanga liasü.

Synrem-i ashiba agi, HYC züngsem aser parnok pusemertem Director den ajuruteptsü atema NEIGRIHMS Administration Block-i ai. Staff aser security den sensak asema

sülen parnok pa indang office-i ai. "Onoki pa dang kimai adoker onok takhangbatem kechiba sentoka toktsü aji rasa ashitsü asüingdanga liasü," ta Synrem-i ashi.

Paisa, Director-i pa mulungka nung kimai adok aser parnok dang pai telangzüba ka renema lir, koba kasa anogo metetdaksütsü ta ashi.

"Onok Ghonda ka ser tesadang shi ata aser iba sülen official telangzüba ka agizük. Iba sülen onok Director aser ketdangsür ka den conference room nung senden amen," ta pai shisem.

Kasa anogo police-i lenir pongu dang Mawdiangdiang police outpost-i arutsü tetuyuba agütsü. Parnok dang ken o ashishiba sülen parnok aotsü temelaba agütsü.

HYC-i taoba mapang, Scheduled Tribe (ST) reservation inyakyim nung aibelenba atema NEIGRIHMS Director ya aitsür liasü.

Parnoki ashiba agi, ketdangsürtemi Nursing Officer vacancies 107 nungi ana dang ST candidate tem nem agütsü, koba shilem 7.5 (menden ti) mekazüktsütsü lateta aliba dang nungi tajemba liasü.

Manipur-Assam arrtsü nung PREPAK züngsem ka apu

Imphal, Luroi/August 27 (Agencies): People's Revolutionary Party of Kangleipak (Progressive) züngsem ka apuba sülen security forces temi Manipur-Assam arrtsü nung anti-insurgency operations akangshiogo.

Pherzawl aser Jiribam district nung taoba anogo ana meita aoba sentong balala benoka inyakba sülen security personnel temi prangbong, injang, bomb aser tongteprateptsü atema amshiba hadir balala ngutetogo. Iba osang ya ketdangsürtemi

Bodhbarnü metetdakja liasü.

Police-i pua aliba PREPAK züngsem ya arishi küm 26 tain Nongmaithem Naocha Meetei ta jangjaogo. Pa ya Imphal East district nung Yaingangpokpi Police Station kübok Yaingangpokpi Makha Leikai tesem nung alir. Pa ya PREPAK telok den sendaktepa liasü.

Pai osang agütsüba dak ajemdaker central aser state police team kati Jiribam Police Station kübok Rashidpur tesem meita ao.

Meita aoba mapang parnoki telungpur tesepe ka ngutet aser

7.62mm SLR ka, 5.56mm INSAS rifle ka, pistol ana, handheld radio sets trok den charger, magazine ana, injang abenba juli ka aser tsüngsem ana nguteta liasü.

Kasa mapang nung Jiribam district nung Chaudharykhal yimtsüing aser Pherzawl district nung Savomphai yimtsüing meita aoba mapang sepaitemi 7.62mm AK-47 ka, 5.56mm INSAS LMG ka, 303 rifle ka, single-barrelled rifle ka, 9mm pistol ka, grenade ana, injang tapu balala 36, handheld radio sets pezü, aser prangbong balala indang magazine asem nguteta liasü.

Karbi Anglong nung sen crore 11 alang morphine apu

Guwahati, Luroi/August 27 (Agencies): Assam police-i Karbi Anglong district nung sen crore 11 alang morphine seret 10.71 puogo, ta ketdangsürtemi Bodhbarnü metetdaksü.

Temesepba mozü ya Mongolbar aonung menor Assam-Nagaland arrtsü anasa sepaitemi meita aoba mapang pua liasü.

Police-i Dilai anasa 6 Mile nung truck ka sot aser temesepba mozü ya gari

anisang menden nung mima bener lia nguteta liasü.

Ken o dak sendakba nung parnok gari nung mena aliba nisung ana puogo aser police-i tena anema Narcotic Drugs and Psychotropic Substances (NDPS) Act kübok provisions balala dak ajemdaker jenjang agi tenzükogo.

Ketdangsürtemi ashiba agi, iba temesepba mozü ngutetba ya iba tesem nung temesepba mozü shibelenertem atema takoksa tulu lir.

"Temesepba mozü shibelenba nokdangtsü onok bendanga agütsür lir. Temesepba mozü shibelentsü atema lenmang kanga junga yanglur lir, saka meita aoba takok anguba shia onok rara tali tashi itshidaksür," ta police ketdangsür tejen kati ashi.

Taoba küm ishika tsüingda Nagaland den arrtsü nung aliba Karbi Anglong kübok tesem balala ya temesepba mozü shibeler aser achirtem atema tongtibang tesem ka kümogo.

Pakistan by-elections nung PTI party shilem magitsü

Islamabad, Luroi/August 27 (Agencies): Taoba Pakistan ato kilonser Imran Khan-i tentetba Pakistan Tehreek-e-Insaf (PTI)-i national aser provincial assemblies atema by-elections agitsü aliba nung shilem magitsü ta sangdongogo.

May 9, 2023 nü rongrong adokba nung shilem agia lir ta tai tonglokja aliba nung PTI lenir aika taoba ita aitsüba sülen item menden ya tazüing akum.

Dawn ajanga ashiba agi, Adiala Jail nung Khan-i pa indang legal team den shisa lemstepba sülen pai shisa agütsüba jembitsü asoshi PTI indang political committee Mongulbarnü ajurutebpa sülen iba telemtetba ya agi.

Aji masüidang Khan teyir Aleema Khan-i tepuokdak pa den ajurutebpa sülen pai osang sangoktsüba media den lemsatepa liasü. Pa meina PTI secretary general Salman Akram Raja ao, shiba taoba mapang osang liaka pa mapa nungi manen ta lai jangjatsü.

Lai Raja ya parnok asoshi kibong ka nungi amai lir ta ashi. Tenu-i party indang political committee dang tanaben adenshia taoba mapang elections nung shilem agitsü lemteta aliba jembishitsü shiogo, ta Aleema-i ashi.

Iba aonung PTI ozüing yanglur Amir Dogar-ia elections nung shilem magitsü Khan tangatetba nung Committee dena lir ta ashi aser PTI legislators tema yakta parliamentary bodies nungi anen tenzüksü ta metetdaksü.

Anogo ka tejakdang ang political committee yagi elections nung tokteptsü vote 12-9 agüja liasü, aser PTI information secretary Waqqas Akram-ibo independents ta mezüingshitsü mechi candidates tem Sunni Ittehad Council (SIC) tickets nungi tokteptsü sangdonga liasü.

Taoba National Assembly speaker Asad Qaiser-i Dawn dang ashiba agi, PTI ya by-polls nungi pila alitsüla ta Khan-

i angateter aser ozüing yanglurtem dang Public Accounts Committee (PAC) densema parliamentary standing committee balala nungi anentsü totuyuba agütsü.

"Parliament ya 'rubber stamp' ka kumogo, kechiaser opposition züingsemtemi house nung jembiba nüburtem dang mesayur," ta pai ashi.

"Sorkari PTI candidate nem by-elections mokokdaksütsü, aser elections nung shilem agira, PTI legislators atsüngdokba nung sorkar inyakyim ya shidak kumdaksütsü ta Khan tangatetba lir," ta Qaiser-i ashi.

Kasa mapang Pakistan nung ruling coalition party ana - Pakistan Muslim League-Nawaz (PML-N) aser Pakistan Peoples Party (PPP) - bo by-elections nung lungjemer tokteptsü sangdongogo.

Elections ya September 18, 2025 nü agitsü ta Election Commission of Pakistan ajanga ashir.

MULUNG NEN O



Asoba Anogo
01-11-1951

Asüba Anogo
22-08-2025

Onoki teti meima aser akhümtsübua aliba tsürabur **Asür. LANUNOCHET** (Chungtia), shiranga aliba mapang nungi tasünü (22-08-2025) tashi kija kibong, kiyonger, yimden, arogo, purmedemsor, yimtsür yimer aser ana aser talang nungi shirnokisa mapang ajak nung ozü kibong den sarasadem, nübo, rongsen, shisatsü aser lenmang balala agi yaritepogo, nenok ajak dang kangasa pelaba metetdaksür.

Onoki tsüngdong aruagi nenok mapa tajung asoshi tepelaba melemsateptet nung iba zülü osang ajanga nenok dang tepalaba lemsateper. Tematiba Tsüngremi nenok ajak moajangmata ozü tamang sarasadem.

Temeim kinüngtsü, chirnurtem aser semchisemnurtem

Donald Trump-i China dang tariff shilem 200 meshitsü amokmeren



Washington, Luroi/August 27 (Agencies): Beijing-i Washington nem magnets agütsütsüla, aji mesüra onoki parnok dang tariff shilem 200 mesüra tali meshitsü, ta US Tir Donald Trump-i Mongulbarnü China amokmeren.

China ya rare earths aser iba oset ayokba nung tali tekumdangba akumer aser United States-i tariff tali meshiba langzüa April ita China-i 'export restriction list' nung rare earth oset kar aser magnets ya inoka liasü.

"China-i onok nem magnets agütsütsüla. Parnoki aji magütsüra onoki tariff shilem 200 mesüra tali meshitsü. Küm 20 tejakdang parnoki magnets amshitsü memesüzükdang shingaia magnets nüngdaka meliasü," ta Trump-i White House nung osangbenertem dang ashi.

Trump-i China dang par jenjang tajungba lir ama ashi. "Asenok China den tesendaktep tajung alitsü... Parnok ket nung cards kar lir. Asenoka cards tajung lir, saka ni item cards ji masayaner. Ni item cards ji asayara, ibaji ajanga China samatsütsü. Ni item cards masayatsü," ta pai ashi.

August 12 nü parnok trade truce ya anogo anogo 90 atsülanga tangatettep kati arutsü asoshi jembishiniür nem mapang tali agütsütsü atema linük ana yagi mulungteper aliba mapang ka nung pai iba o ya ashi.

US aser China tsüngta tariff tongpang ya küm tetenzüklen

tesashiba akum, kong Trump-i tariff shilem 145 meshi aser Beijing-ia tayang kepzüka iba mesük mera agia liasü. Iba sülen US aser China linük kati ka dang tariffs meshiba shilem 55 aser 32 agi ajemtsü mulungtep, koba November ita tiyonglen liwatsü.

Beijing-i rare earths nung soitba den tokteptsü asoshi Washington atema airplane parts ya tongtipang lir ta Trump-isa ashi. "Parnoki asen nem magnets magütsüra asenoki par nem Boeing parts magütsütsü aser parnok indang tayimtsü 200 mesenzütettsü."

Beijing-i April ita rare earth magnets ayokba azüokba jenjang nung tangya aliba mapang Trump-i iba sangdong ya agütsü. May ita dang nungi June ita nung magnets ya US dangi tenetben agi tali shilem 660 yoka liasü aser July nung shilem 76 tali akum.

Rare earth magnet yangluba ya China-i amokbanga lir aser alima nung supply agütsüba shilem 90 shi par kübok lir, anungji US den shishilempaba ken o jembitsü atema Beijing jenjang tajungba nung lir, kechiaser Washington-i automobiles, electronics aser renewable energy amala manufacturing sector tulu atema rare earth magnets nung kanga metaloka lir.

China-i India dang rare earth magnets ayokba soita aliba agentsü mulungogo, aser tanü nungi tenzüka US-i Indian imports nung tariff talila shilem 25 meshir.

Gaza mozüki amakba Israel-i tiazü jembir: Hamas

Gaza City, Luroi/August 27 (Agencies): Israel mitkari Nasser Hospital nung Hamas surveillance camera ka nung nung tenük yoker amak aser Hamas züingsem trok tepset ta ashiba sülen Hamas-i iba mozüki nung nisung 21 tepsetba ya kata par züingsem masü ta ashi.

Israel sorkari Hamas züingsem trok tepset ta jembiba parnok tenüngtem sangdongang, ta Hamas-i Bodhbarnü ashi, kong osangbener, medics, rescue workers aser civilian tem tepsetba atema alima tesem balala nungi aija liasü.

Israel mitkari Palestine nunger nisung trok tenüng agütsüba nungya anabo mozüki nung anaben amakdang

tepsetba masü saka danga mapang aser tesem nung tepsetba lir, aser kabo Khan Younis nung aliba mozüki nungi meta talangka pilar al-Mawasi nung tepsetba lir, ta Hamas-i ashi.

Israel mitkari Gaza south len mozüki amakba indang bushisüngdangba nung target ya yangji yua aliba camera ka liasü, koba Israel sepaitem senzüsempokba mitba nung Hamas-i amshi, ta shia liasü.

"Iba yongji sepaitemi camera raksatsütsü inyak," ta Israel army-i ashi.

Hombarnü Israel-i mezüing amakdang cameraman Hussam al-Masri-i amshiba Reuters news agency live video feed ya ajungbena shibang. Iba mapang al-Masri

ya tepset.

Minute ishika lir tanaben amakba ya tangok, kong Israel nungeri mezüing amakba mapang yirur alirtem yaritsü asoshi asemtepa aruba rescue workers den osangbener ano pezü tepset.

Osangbener pezü ya Ahmed Abu Aziz, Mariam Abu Daqqa, Mohammad Salama aser Moaz Abu Taha nungertem alitsü.

Ibai anaben ashitena amakba alitsü, kong Israel sepaitemi mozüki nung bomb pokloktsü aser emergency responders aser osangbenertem aru atar bomb tanabuba pokloktsü.

Israel-i Gaza tesem balala nung amakba ya Hamas dak tenük yoker ta teti temeden bushir.



Hanoi nung August 27, 2025 nü tzü agi metsüngbanga aliba yimtung nung nisungtem senzüba noksa ka yangi angur. Kajiki yipru süyiba sülen tzünglu tanen makai aruba ajanga Bodhbarnü Vietnam tesem aika nung tzümetzüng adoka alinen aliba lendong ajurua nisung ti asü, 34 yiru aser ka samar bushitar. Tzükum anasa aliba nisung 6,00,000 shi pei ki yutsür tesem balala nung jenoka lir.

Nagaland Tug of War team-i bronze medal angur



Nagaland team nungi asayartem Wet & Joy Water Park, Shirdi nung tangokba noksa nung angur.

Kohima, Luroi/August 27 (TYO): Nagaland Tug of War Association (NTWA) tetsür team-i 38buba Senior National Tug of War championship, Senior Women 500 Kg category nung bronze medal nguogo. Iba asayamung ya Shirdi, Maharashtra nung August 22 nungi 25 tashi asaya liasü.

Team Manager, Kuzhovesa Soho-i sangdong ka ajanga ashiba agi, tetsür asayar ti den ketdangsür anati Nagaland tenüng nung iba asayamung nung shilem agi, koba Chief Minister, Dr. Neiphiu Rio-i sponsor asü.

Bronze medal atema asaya nung Nagaland team-i Uttar Pradesh koka liasü.

Tetsür team hopta ana

renemba sülen tang mezügbuba iba asayamung nung shilem agiogo aser parnoki parnok tashi aser tasa tajung sayuba den Nagaland atema medal ka ngutsüogo.

Team Manager Kuzhovesa Soho aser Team Coach Vemele Thingo liasü. Asayartem rongnung Vikehenuo Zumvu (Captain), Vekhonieli Curhah, Haizuyile, Thejaneinuo Thevo, Sezolu Luruo, Medongunuo Thevo, Neivi Metha aser Keneithonuo Sanchu nung densema liasü.

Team takok anguba tenüng nung August 25 nü Shirdi nung Wet & Joy Water Park semdanga tenügsang agütsüba sentong tatsü ka agia liasü.

Kasa mapang nung team-i

parnok sponsor asüba atema Chief Minister Dr. Neiphiu Rio dang kanga pelaba lemsatsep. Parnokisa June ita nungi NTWA tetsür aser tebur team atema training ground agütsüba asoshi 13 Assam Rifles Commandant Col. Tarun Rana aser pa kübok inyaktertem dang kanga pelaba lemsatsepogo

Kasa mapang nung Nagaland nungi tebur asayar 8 tang World Outdoor Tug of War championship nung shilem agitsü atema Patiala nung training agidar. Iba asayamung ya Nottingham England nung September 4 nungi 7 tashi asayatsü. Parnok ya India team nung shilem ka asütsü aser parnok September 3 nü Nottingham-i aotsü.

DYRS-i ayongzüka Inter School Athletics Meet asayaogo

Kohima, Luroi/August 27 (TYO): National Sports Day nüngdem nung Department of Youth Resources & Sports, Nagaland-i ayongzüka August 27 nü Indira Gandhi Stadium Kohima nung Inter School Athletics Meet 2025 ayongzüka asayaogo.

Sentong nung Kethosituo Sekhose, Director, Department of Youth Resources & Sports alakteta jaoker liasü aser pai saisabong ya süoki ia agitsü nüngdakba lemsatapa liasü.

Sekhose-i ashiba agi, National Sports Day ya küm shia August 29 nü India nung nüngtugu hockey asayar Major Dhyhan Chand asoba anogo amunger.

Paisa, athletics meet nung takok angurtem August 29 nü Indira Gandhi Stadium nung tushitsü ta metetdaksü. Takokertem dang iba anogo teacher in-charge den arutsü metetdaksüogo.

Additional Director, DYRS Megolhu Dolie lenisüba nung iba asayamung asaya aser asayamung lapokba sentong ya Tokavi Zhimomi LDA DYRS lenisüba nung agi.

Takokertem:

- * 100 M (Class 7-8 Boys)
 - 1st- Vikash Khwash, Mt Carmel School
 - 2nd- Ruokuozo, G Rio
 - 3rd- Aneizo Meru, Don Bosco
- * 100 M (Class 7-8 Girls)
 - 1st- Dzevinuo, Northfield

- 2nd- Viphreno, Northfield
- 3rd- Rokovine, Christ King
- * 100 M (Class 9-10 Girls)
 - 1st- Pelevinuo, Northfield
 - 2nd- Keneingunuo, Christ King
 - 3rd- Dzevinuo Chusi, Mezhür School

- * 100 M (Class 9-10 Boys)
 - 1st- Diezevi Merü, Don Bosco
 - 2nd- Mengukhriezo Theodore, Don Bosco
 - 3rd- Dziesetuo Solo, Vineyard

- * 200 M (Class 7-8 Girls)
 - 1st- Dzevinuo, Northfield
 - 2nd- Viphreno, Northfield
 - 3rd- Rokovine, Christ King

- * 200 M (Class 7-8 Boys)
 - 1st- Inohito, Christ King
 - 2nd- Alohito, Christ King
 - 3rd- Shinglang, Mt Hermon

- * 200 M (Class 9-10 Girls)
 - 1st- Zevokhrienuo, Mezhür School
 - 2nd- Keneingunuo, Christ King
 - 3rd- Pelevinuo, Northfield

- * 200 M (Class 9-10 Boys)
 - 1st- Neikezelhou Robert Dzüvichu, Don Bosco
 - 2nd- Diezevi Meru, Don Bosco
 - 3rd- Throngkiu Khiphuru, Mezhür School

- * 400 M (Class 7-8 Girls)
 - 1st- Viboli Achumi, Mezhür School
 - 2nd- Thungreni Ezung, Mezhür School
 - 3rd- Mumu, Christ King

- * 400 M (Class 7-8 Boys)
 - 1st- Kevizezo, Christ King
 - 2nd- Vimezo Rupreo, Mezhür School
 - 3rd- Arenpong Jamir, Vineyard

- * 400 M (Class 9-10 Girls)

- 1st- Ruopfuvinu, Christ King
- 2nd- Megungunuo, Northfield
- 3rd- Utulu Nakro, Vineyard
- * 400 M (Class 9-10 Boys)
 - 1st- Apoujam Newmai, Don Bosco
 - 2nd- Chatha, Christ King
 - 3rd- Neikezelhou Robert Dzüvichu, Don Bosco

100x 4 M relay

- * Class 7-8 Girls
 - 1st- Northfield
 - 2nd- G Rio
 - 3rd- Mezhür School

- * Class 7-8 Boys
 - 1st- Don Bosco
 - 2nd- Christ King
 - 3rd- Mt Hermon

- * Class 9-10 Girls
 - 1st - Christ King
 - 2nd- Mezhür School
 - 3rd- G Rio

- * Class 9-10 Boys
 - 1st - Don Bosco
 - 2nd- Christ King
 - 3rd- G Rio

Long Jump

- * Class 7-8 Girls
 - 1st- Mezhür Hr Sec School
 - 2nd- Northfield
 - 3rd- Mezhür Hr Sec School

- * Class 7-8 Boys
 - 1st- Don Bosco
 - 2nd- Mt Carmel
 - 3rd- Christ King

- * Class 9-10 Girls
 - 1st- Christ King
 - 2nd- Don Bosco
 - 3rd- Mezhür Hr Sec School

- * Class 9-10 Boys
 - 1st- Don Bosco
 - 2nd- Vineyard
 - 3rd- Christ King

US Open: Sinner aser Swiatek na tanabuba round-i iogo

Luroi/August 27, 2025

(Agencies): US Open tebur kija asaya nung defending champion Jannik Sinner-i kanga junga asaya tenzükogo aser tetsürtem rongnung Iga Swiatek-a tanabuba round-i iogo.

Italy nunger asayar Sinner-i mezügbuba round nung Czech nunger asayar Vit Kopřiva 6-1, 6-1, 6-2 agi koka liasü. Tena tsüingda ghonda ka ser minute 38 asaya.

Arishi küm 24 tain Sinner ya taruba asaya Alexei Popyrin den asayatsü.

Kasa asayamung tetsür kija asaya nung Poland tsür Swiatek-i 6-1, 6-2 agi Colombia tsür Emiliana Arango ayong ayonga kokogo.

Arishi küm 24 tain Poland tsüla yagi asaya tetenzük nungi amokbanger asaya liasü. Iba asaya akokba sülen Swiatek-i Monica Seles (64) ajateta WTA-level first-round asaya 65 atonga akokba mezügbuba

asayar kümogo.

Grand Slam trok tashi koker alila, shibai 2022 küm US Open kokogo, la tanabuba round nung Netherlands tsür Suzan Lamens den asayatsü.

Mongolbarnü tetsür kija asaya tanga ka nung Ukrain tsür Marta Kostyuk-i 6-4, 6-4 agi Britain tsür Katie Boulter kokogo, aser United States tsür Amanda Anisimova-i Australia tsür Kimberly Birrell 6-3, 6-2 agi koka liasü.

Brazil tsür Beatriz Haddad Maia-ia 6-3, 1-6, 6-1 agi Britian tsür Sonay Kartal kokogo.

Ajisüaka France tsür Lois Boisson atema tezüdangtsüka lai Switzerland tsür Viktorija Golubic, 3-6, 7-6 (7/3), 6-2 agi makok.

Maneni tetsür kija asaya nung 2023 US Open champion aser third seeded asayar Coco Gauff-i kanga toktepba asayar Australia tsür Ajla Tomljanovic 6-4, 6-7 (2/7), 7-5 agi kokogo.

Asian Shooting C'ships: Anish-i silver medal angur



Luroi/August 27, 2025

(Agencies): India nunger shooter Anish Bhanwala-i Bodhbarnü tang Shymkent, Kazakhstan nung asaya aliba Asian Shooting Championships tebur 25m Rapid Fire Pistol event nung silver medal nguogo.

Arishi küm 22 tain Anish-i final asaya nung point 35 angur, koba China nunger gold medal angusang Su Lianbofan dang nungi point ka agi dang tajemba liasü.

Kasa asaya nung bronze medal ya South Korea nunger asayar Lee Jaekyoon-i ngua liasü.

Mongolbarnü Olympian Sift Kaur Samra-i kanga junga asaya-a tetsür 50m rifle 3 positions nung gold medal angur

aser Ashi aser Anjum Moudgil na den longjemer India tetsür team-i gold medal anguba nunga teyari tulu agüja liasü.

Junior asaya densema India nunger asayartemi iba asayamung nung tang tashi nung medal 72 ngur lir. Item medal tem rongnung 39 gold medal lir aser aji timba junior shooter temi kanga junga asayaba ajanga lir.

Tang tashi nung India senior team-i gold teku, silver pezü aser bronze medal tenet ngua lir. Asian Shooting Championships nung India nunger asayar 35 asaya 15 nung medal atema asaydar. Kasa mapang nung Shymkent meet nung India nunger asayar 129 junior events nung toktepdar.

BILEMDANGANG

"Tebilemdangba tamajung melenshiba anogo nü taküm melenshitsü."